





東都事略卷第十三

承議郎新權知龍州軍州兼管内勸農事管界公邊都

世家一



詩稱關雎之德所以正夫婦而化天下也是以輔佐君子有逮  
下之仁而無嫉妬之心懷進賢之志而有憂勤之念用能助成  
一代之治以興太平之基塗山啓夏任姒作周豈不曰內德之  
茂哉 昭憲杜后篤生 上聖以造我 宋其宏規遠慮實應  
關雎之德與塗山任姒亦何以異自 昭憲以降正始之道相  
守如一皆以遵承 祖宗家法為先是雖賢德懿範有所從始  
然亦 列聖脩身正心齊家之本有以極其摯如此至於名品  
之別儀制之序其所由來者尚矣故略而不書  
宣祖昭憲皇后杜氏定州安喜人也父爽贈太師 后既笄歸



于 宣祖治家嚴毅有禮法生 太祖 太宗周顯德中 太祖為定國軍節度使封南陽郡太夫人及 太祖為羣情推戴自陳橋還京師人走報 后曰 點檢已作天子 后曰 古兒素有大志今果然矣 太祖既即位拜 后於堂上眾皆賀 后愀然不樂左右進曰臣聞母以子貴今子為天子胡為不樂 后曰吾聞為君難且天子者置身兆庶之上若治得其道則此位可尊苟或失馭則求為匹夫不可得是吾所以憂也子其勉之 太祖再拜曰謹受教於是尊為 皇太后建隆二年 后不豫 太祖侍藥餌不離左右疾亟召趙普入受顧命 后因問 太祖曰汝知所以得天下乎 太祖嗚噎不能對 后問之如初 太祖曰臣所以得天下者皆祖考及 太后之積慶也 后曰不然正由周世宗使幼兒主天下耳使周氏有長君

天下豈為汝有乎汝百歲後當傳位于汝弟四海至廣萬幾至眾能立長君社稷之福也 太祖頓首泣曰敢不如 太后教

后因謂趙普曰爾同記吾言不可違也命普於榻前為約誓書普於紙尾自書名云臣普書藏之金匱命謹密宮人掌之 后崩于滋德殿年六十謚曰明憲葬 安陵 神主祔享 太廟 乾德二年改卜安陵更謚曰 昭憲合祔 安陵

太祖孝惠皇后賀氏開封人右千牛衛率府率景思長女也晉開運初 宣祖為 太祖媵焉 太祖領定國軍節度使封會稽郡夫人性溫恭柔順事 舅姑盡禮生子德昭周顯德五年

寢疾崩年三十 宋興追冊為皇后謚曰孝惠葬于 安陵之西北 神主享于 別廟 神宗時與 孝章 淑德 章懷 並祔享 太廟



孝明皇后王氏邠州新安人彰德軍節度使饒之第三女也  
孝惠崩納為繼室封琅邪郡夫人建隆元年立為皇后 后慈  
仁恭勤奉養 太后得其驩心崩年二十二謚曰孝明享于  
安陵之北 神主享于 別廟太平興國二年祔享 太廟  
孝章皇后宋氏河南洛陽人左衛上將軍偓之長女也 孝明  
崩 太祖遂娉入宮為皇后年十七性柔順好禮 太祖崩號  
開寶皇后居西宮雍熙四年移居東宮崩年四十四謚曰孝章  
祔葬 永昌陵之北神主享于 別廟 神宗時祔 太廟  
臣稱曰廟室祔以一后若追冊者則否 太祖祔以孝明者禮  
之正也 太宗祔以 懿德者蓋以 明德在也及 明德崩  
與 懿德同祔而 元德以誕育 真宗亦得祔焉此則禮從  
變也於此之時 孝章豈不應與 孝明同祔邪 真宗廟室

亦祔 三后而 孝章又不得升配 太祖復何邪至 神宗  
之世追冊之后並配于廟於是 孝章始升祔云

太宗淑德皇后尹氏相州濮人滁州刺史廷勛之女也 太宗  
在周時娶焉早崩 太宗即位追冊為皇后謚曰淑德葬于

孝明陵之西北享于 別廟後神主升祔 太廟

懿德皇后符氏陳州宛丘人魏王彥卿第六女也顯德初歸

太宗 國初封汝南郡夫人建隆二年封楚國夫人 太宗封

晉王進封越國崩年三十四葬于安陵之西北 太宗即位追

冊為皇后謚曰懿德享于 別廟 真宗即位 詔有司議

太宗配后宰相請以 懿德配而宗正卿趙安易請以 淑德

配是時禮官以 明德在萬安宮 淑德 懿德生不及尊崇

之位没升配享於人情未安請虛配位祕閣校理吳淑駁議皆



以為未允時將追尊 元德淑因請以 元德升配 詔曰禮  
非天降地出酌于人情其以 懿德皇后配於是 神主升祔  
太廟

明德皇后李氏潞州上黨人淄州刺史處耘第二女也 懿德  
崩 太祖為 太宗娉為妃既納幣會 太祖崩至太平興國  
二年始入宮雍熙元年立為皇后 太宗崩 真宗即位尊  
后為皇太后居西宮之嘉慶殿上宮名曰萬安崩年四十五謚  
曰明德祔葬 永熙陵禮官請以懿德 明德同祔 太宗室  
以先後為次從之

元德皇后李氏真定人乾州防禦使英之女也開寶中封隴西  
郡君 太宗即位進夫人性恭肅有法度六宮推重之生楚王  
元佐及 真宗薨年三十四 真宗即位追封賢妃又追上尊

號為皇太后謚曰元德祔葬 永熙陵享于 別廟大中祥符  
三年禮官趙湘請以 元德皇后祔 太宗廟室 真宗曰此  
重事也俟今禮官議之至六年宰相王旦與羣臣繼請然後從  
之祔 明德之次

真宗章懷皇后潘氏大名人忠武軍節度使美之第八女也  
真宗為韓王 太宗為娉之召入宮封莒國夫人崩年二十二  
真宗即位追冊為皇后謚曰莊懷葬于 永昌陵側陵名保泰  
神主享于 別廟後升祔 太廟 國朝皇后謚冠以 帝謚  
慶歷中禮官言孝字連 太祖謚德字連 太宗謚遂改莊為  
章以連 真宗謚云

章穆皇后郭氏太原人宣徽南院使守文第二女也 真宗為  
襄王 太宗為娉之封魯國夫人進封秦國 真宗即位立為



皇后崩年三十二謚曰莊穆葬 永熙陵之西北 神主享于別廟乾興元年升祔 真宗廟室後改謚曰章穆

章獻明肅皇后劉氏益州華陽人也父通贈太師魏王 后善播鼗蜀人龔美與之入京師美以鍛銀為業 真宗為襄王納于潛邸張耆為王宮指使王乳母秦國夫人性嚴整因令 王斥去因為 太宗言之王不得已置之張耆家 太宗崩

真宗即位以為美人以其無宗族乃更以美為兄弟改姓劉大中祥符中為脩儀進德妃自 章穆崩 真宗欲立為皇后大臣多以為不可 真宗卒立之 李宸妃入宮生子是謂 仁宗 后以為己子與楊淑妃撫視甚篤天禧四年 真宗疾甚宰相寇準密議請 皇太子監國以謀泄罷相既而入內都知周懷政謀廢 后復用準為楊崇勳所告懷政誅準貶海上

真宗崩 仁宗即位尊 后為皇太后軍國大事權取 皇太后處分垂簾聽政 詔書稱吾以生日為長寧節出御大安輦鳴鞭侍衛如乘輿父名通令天下皆避父諱有劉綽者自京西還朝以其在部日盤量在庾之糧得千餘斛乞付三司

后問曰卿識王曾張知白呂夷簡魯宗道乎此四人者豈因盤糧 出贖進哉綽大慙當時廷臣皆服 后之明天聖七年冬至 仁宗率百官上壽于會慶殿及恭謝宗廟乘玉輅禕衣九龍華釵冠行禮則服衮衣減宗彘藻去劔戴儀天冠前後垂珠翠各十旒于時小臣方仲弓上書請依武后故事立劉氏廟而程琳亦獻武后臨朝圖 后擲其書于地曰吾不作負 祖宗事 后稱制凡十一年自 仁宗即位乃諭輔臣曰 皇帝聽斷之暇宜詔名儒講習經書以輔其德於是設幄崇政殿之西



庶而日命近臣侍講讀丁謂曹利用既以侮權貶竄而天下惕然畏之晚年稍進外家而信任內官仁宗春秋高猶不知為宸妃所出終后之世無豪髮間隙蓋仁宗能盡孝而后亦慈愛保護之至也崩年六十四謚曰章獻明肅國朝皇  
后二謚稱制者則加四謚葬于定陵之西北於是泰寧軍節度使同平章事錢惟演請以章獻明肅章懿與章穆並祔真宗之室詔禮院議禮官以章穆祔食真宗斯為正禮章獻母儀天下與明德例同章懿帝母之尊與元德例同且前代無同日並祔之禮其二后或祔真宗廟室或祀別廟惟上財之詔三省與禮院更議皆以謂章穆皇后位宗中壺與懿德無異已祔真宗廟室自叶一帝一后之文章獻明肅處坤元之尊章懿感日符之貴皆功

德莫與為比謂宜崇建新廟同殿異室歲時薦饗一用太廟之儀仍別立廟名以崇世享於是翰林學士馮元等請以泰慈為名詔從之至慶歷五年禮院言章獻章懿二后請遵國朝懿德明德元德三后同祔太宗廟室故事遷祔真宗廟室詔兩制議翰林學士王堯臣等議請二后遷祔真宗廟室序於章穆之次從之章懿皇后李氏杭州人也性莊重寡言初入宮為司寢生仁宗封崇陽縣君進才人為婉儀仁宗即位為順容初章獻以仁宗為己子而后不敢言中外亦未知也及后病革乃進為宸妃薨年四十六章獻崩明道二年追冊為皇太后謚曰章懿葬永定陵祔于別廟升祔太廟章惠皇后楊氏益州郫人也少事真宗于藩邸景德初為才



人進婕妤又進婉儀拜淑妃 真宗崩以遺制爲皇太妃 章  
獻崩遺誥爲皇太后同議軍國事議者以 仁宗春秋高遂刪  
去同議軍國事之語不以放天下號保慶皇太后 仁宗亦有  
嗣每勸 仁宗選宗子近屬養于宮中其選即 英宗也無疾  
而終年五十三謚曰章惠

仁宗廢后郭氏平盧軍節度使崇之孫也后生而性聰悟有容  
德夫聖二年立爲皇后時 仁宗寵張美人欲以爲后 章獻  
難之后既立而頗見疎也其後尚美人楊美人俱得幸數與后  
忿爭宰相呂夷簡請廢后 仁宗亦以其無子遂廢之封爲淨  
妃玉京冲妙仙師賜名清悟居長樂宮於是御史中丞孔道輔  
右司諫范仲淹等伏閣言后無過不可廢既而道輔等俱被逐  
景祐元年出居瑤華宮而尚美人亦廢於洞真宮入道楊美人

於別宅安置又賜號金庭教主冲靜元師 仁宗頗念之遣使  
存問賜以樂府后和荅之辭甚悽愴 仁宗嘗密令召入后曰  
若再召我須百官立班受冊方去其所守如此后有小疾命內  
侍閻文應挾盥眇療數日乃言后暴薨年二十四外人莫能明  
也 仁宗甚悼之追復皇后而停謚冊祔廟之禮

慈聖光獻皇后曹氏贈韓王彬之孫贈吳王玘之女也 皇后郭  
氏廢 詔娉入宮冊立爲皇后 后性節儉喜稼穡宮中種五  
穀親蠶好讀史書飛白慶歷八年後八月望日 仁宗欲於禁  
中張燈 后諫止之後三日衛士作亂至寢殿 仁宗聞變遽  
欲出 后召都知王守忠以兵入衛 后知賊必縱火乃遣宦  
者持水踵賊後賊果以燭焚簾水隨滅之是夕所遣宦者 后  
親剪髮以爲識諭之曰賊平加恩當以髮爲證故宦者爭盡死



力賊即擒滅張貴妃專寵驕恣后待之謹妃屢危中之卒不能  
害也 英宗始四歲鞠養于禁中 宣仁聖烈皇后 后之甥  
也與 英宗同歲亦鞠於 后所 仁宗曰他日以此女歸之  
后許諾 仁宗春秋高未有繼嗣天下寒心 后居中決定大  
策遂以 英宗為皇子入居慶寧宮 后待之恩意尤密 仁  
宗崩 英宗即位尊 后為皇太后 英宗感疾 詔軍國事  
請 太后權同處分乃御內東門小殿垂簾聽政天下翕然事  
涉曹氏及內臣者無少絲毫假借 英宗寢康復 后下手書  
歸政 詔以所居宮殿名曰慈壽 英宗崩 神宗即位尊  
后為太皇太后易宮名曰慶壽 神宗用王安石變更法度用  
兵興利而天下紛然 神宗一日侍 宣仁后同政王至 慶  
壽宮 后曰吾昔聞民間疾苦必以告 仁宗嘗因赦行之今

宗祀在邇亦當爾 神宗曰今無他事 后曰吾聞民間甚苦  
青苗助役錢宜因赦罷之 神宗曰新法以利民非苦之也  
后曰王安石誠有才學怨之者衆何不出之於外 神宗曰羣  
臣中唯安石能橫身為國家也歧王曰 太皇太后之言至言  
也 陛下不可不思 神宗不懌 神宗有意於燕薊已與大  
臣議定乃詣慶壽宮白其事 后曰儲蓄賜予備乎鎧仗士卒  
精乎 神宗曰平戎所須積有年所固已辦之矣 后曰事體  
至大吉凶悔吝生乎動得之不過南面受賀而已萬一不諧則  
生靈所係粟帛所盡未易以言苟可取之 太祖 太宗收復  
父矣何待今日 神宗曰敢不受教蘇軾以詩得罪下御史獄  
人知必死 后違豫中聞之謂 神宗曰嘗憶 仁宗以制科  
得軾兄弟甚喜曰吾為子孫得兩宰相今聞軾以作詩繫獄得



非仇人中傷之据至於詩其過微矣吾疾執已篤不可以寬濫  
致傷中和宜熟察之 神宗涕泣軾由此得免 后疾久不平  
忽顧左右問此為何日左右對以十月二十日 后頷之迺自  
詔曰只此日去只此日去免煩他百官蓋是日 太祖大忌也  
遂崩其達死生之變如此年六十四謚曰慈聖光獻葬于 永  
昭陵 神主祔于 太廟

温成皇后張氏河南永安人也祖頴進士第終建平令父堯封  
亦舉進士為石州推官以平時兄堯佐補蜀官堯封妻求挈孤  
幼隨之官堯佐不收恤辭以道遠止之堯封母錢氏女也妃幼  
無依由錢氏納于章惠皇后宮寢長得幸有盛寵妃巧慧多智  
數善承迎執動中外慶歷元年封清河郡君歲中為才人遷階  
媛三年忽被疾曰妾姿薄不勝寵名願為美人許之皇祐初進貴  
顯云

妃後五年而薨年三十一 仁宗哀悼之追冊為皇后謚曰温  
成父堯封追封清河郡王謚曰景思而堯佐寅緣僥幸致位通  
顯云

東都事略卷第十三



東都事略卷第十四

世家二

英宗宣仁聖烈皇后高氏亳州蒙城人也曾祖瓊贈魏王祖繼  
勳贈楚王父遵甫贈魯王 慈聖光獻皇后 后之從母也以  
故少與 英宗同育禁中既長歸 英宗 英宗入繼大統治  
平二年立為皇后 后明睿習史所以輔佐憂勤備至 后既  
立弟士林管當御藥院將遷官 后曰妾乃安敢上比 章獻  
明肅皇后及 皇太后 陛下承顏長樂故推恩曹氏以致孝  
愛之意願毋以妾故亂 祖宗法 神宗即位尊為 皇太后  
宮曰寶慈元豐七年大燕 延安郡王侍立 神宗諭輔臣曰  
明年建儲當以司馬光呂公著為師保至明年 神宗不豫王  
珪蔡確韓縝章惇請對福寧殿珪乞立 延安郡王為皇太子



請太后權同聽政 神宗頷之 珪等見太后簾下 后泣  
撫 王曰兒孝順自 官家服藥未嘗去左右 書佛經以祈福  
喜學書已誦論語七卷 絕不好弄 乃令 王出簾外見珪等 珪  
等再拜謝且賀 是日降制立為 皇太子 后敕中人梁惟  
簡曰 令汝婦製一黃袍十歲兒可衣者 密懷以來 蓋為 王倉  
卒踐祚之備也 神宗與 后屬意於 哲宗者 如此 初 雍王  
顥 曹王 顥 日諧 寢殿 問起居 至是 后諭二王 非宣召 毋得入  
哲宗即位 尊為 太皇太后 與 皇帝 御延和殿 垂簾聽政  
詔書稱 吾以生日為 坤成節 出入御大安輦 警蹕侍衛如乘輿  
立 魯王 諱 更 宮名曰 崇慶 召 司馬 光 呂公著 等于外 未至 遣中  
使迎勞 手書問以 今日設施 所當先者 既而有 旨散遣 脩京  
城役夫 罷減 皇城內 覘者 止御前 工作出 近侍 無狀者 三十餘

人 戒敕中外 無敢苛刻 暴斂 廢導洛司 物貨及民所養 戶馬寬  
保馬限 皆從中出 大臣不與 王珪 薨 蔡確 章惇 以罪去 韓縝 亦  
罷政 光與公著 同心輔政 於是更新法之不便於民者 以常平  
舊法 改青苗 以嘉祐 差役 參政 募役 除市易之法 寬茶鹽之禁  
賜邊砦 贖亡民 以和 西戎 而天下復安 元祐三年 御試進士 有  
司請如 天聖 故事 皇帝 皇太后 同御殿 不許有司請受冊  
文德殿 后曰 吾豈敢比 章獻 且 文德殿 天子正牙也  
非女主所當御 以早 詔停冊禮 羣臣固請 乃聽 廷議 患官冗  
詔裁損 外家 恩四之一 服用 儉質 素見厚於 慶壽 尊其餘 矩  
不敢忘 斥賣 橐裝 命近侍 往西洛 舉 曹氏 喪數百 悉封之 后  
臨朝九年 於寢食起居 所以調護於 哲宗者 懇惻 周盡 八年  
后寢疾 召宰輔 至簾前 曰 今日疾少間 欲與公等訣 皇帝年



少善輔導之崩年六十二謚曰宣仁聖烈葬永厚陵 神主  
祔享 太廟

神宗欽聖憲肅皇后向氏故宰相敏中之曾孫贈楚王傅亮之  
孫贈秦王經之女也以治平三年歸于 潁邸封安國夫人

神宗即位立為皇后 神宗崩 哲宗即位尊為皇太后居慈

德宮 后平居無玩好閱 祖宗實錄寶訓遂以通知政事向

氏有援他族例遷官者 后曰吾族未嘗有此詎可以恩廢法

哲宗選 后及諸王擇婦 后豫戒族人勿以諸女自言 宣

仁聖烈皇后命有司葺舊慶壽宮請 后居之 后固辭曰豈

有婦居東而姑處西瀆上下之分 宣仁嘉其正以慶壽後殿

為隆祐宮 哲宗崩宰相章惇有異議 后毅然獨斷決策立

徽宗遂權同處分軍國事凡故事所有如御正殿避家諱立誕

節之類皆不用每聞褒錄勲賢省賦息兵崇儉愛民之事則喜

見容色是歲降手書還政崩于 慈德殿年五十六謚曰

欽聖憲肅葬永裕陵 神主祔于 太廟

欽成皇后朱氏本姓崔父傑母李氏 后少依任廷和家冒繼

父朱士安姓初入宮為侍御進才人又進婕妤元豐中拜昭容

封賢妃進德妃 哲宗即位尊為皇太妃居瑞聖宮 哲宗及

蔡王似皆其所生也元祐三年 太皇太后詔曰 皇帝嗣位

于茲四年皇太妃以恭儉之德鞠育之恩雖典策以時奉行而

情文疑有未稱 皇帝以祖考之奉尊無二上而吾惟春秋之

義母以子貴其推天下之養以慰人子之心宜下有司尋 緝典

故於是櫛子飾以龍鳳織用紅羅增從衛人冠服等並依皇后

惟所居宮閣不設鷓尾又 詔皇太妃儀制已依皇后其宮閣



合稱殿與不禮官言緣禮尊無二上 皇太妃無稱殿立殿名  
之制 宣仁后山陵復土復下 詔令禮官參攷典禮又 詔  
曰昨親奉 皇太后聖諭 皇太妃特與立宮殿名坐六龍輿  
進黃繖出入由宣德正門三省乃議 皇太妃坐龍鳳輿繖紅  
黃兼 遇從 皇太后出入止用紅宮中並依皇后儀制於是  
宮殿名並以瑞聖為名崇寧元年崩年五十一追尊為 皇太  
后謚曰欽成陪葬 永裕陵 神主升祔于 神宗廟室  
欽慈皇后陳氏開封人也以選入禁中年十七 神宗以為侍  
御生 徽宗封才人遷美人薨年三十三贈貴儀 徽宗即位  
詔有司議尊崇之禮追號皇太妃建中靖國元年追尊為 皇  
太后謚曰欽慈陪葬 永裕陵 神主陞祔于 神宗廟室  
哲宗昭慈聖獻皇后孟氏洛州人眉州防禦使元之孫女也元

祐七年 太皇太后以六禮儀制娉入宮立為皇后以左僕射  
呂大防攝太尉充奉迎使同知樞密院事韓忠彥攝司徒副之  
尚書左丞蘇頌攝太尉充發策使僉書樞密院事王巖叟攝司  
徒副之尚書右丞蘇轍攝太尉充告期使皇叔祖同知大宗正  
事 景攝宗正卿副之皇伯祖判大宗正事高密郡王宗晟攝  
太尉充納成使翰林學士范百祿攝宗正卿副之吏部尚書王  
存攝太尉充納吉使權戶部尚書劉奉世攝宗正卿副之翰林  
學士梁燾攝太尉充納采問名使御史中丞鄭雍攝宗正卿副  
之 后既立而劉婕妤好寵幸陰有奪位之意紹聖三年 哲宗  
遂廢 后黜居瑤華宮賜號華陽教王玉清妙淨仙師名冲真  
初 后朝謁 景靈宮訖事就坐諸嬪御皆立侍劉婕妤獨背  
立簾下 后問中人陳迎兒唱曰綽開婕妤背立如故迎兒退



歸有不平語由此閤中皆忿冬至日會朝 隆祐宮侯見於他所 后所御坐朱髹金飾宮中之制惟后乃得之劉婕妤在他坐意象頗愠其從行者為易坐製與 后等衆皆側目不能平者 傳唱曰 皇太后去所婕妤亦起立尋各復所或已徹婕妤坐頓于地懟不復朝泣而去且訴于 哲宗內侍郝隨謂婕妤曰毋以此戚戚願蚤為大家生子此坐正當為婕妤有身會福 公主疾 后有姊頗知鑿嘗已 后危疾以故出入掖庭公主藥弗效廼取道家治病符水以入宮媪以示 后后變色問曰此何從來媪對以實 后曰六姊寧知中禁嚴密與外舍異邪戒令存之俟見 上言所以然已而 哲宗過視公主疾 后持以告 哲宗 哲宗曰此亦人情之常耳 后即取符於前宮禁相傳厭魅之端作矣方公主病革忽有紙錢在旁

后顧視頗惡忌之意自婕妤所遣人持來益有疑心未幾 后養母聽宣夫人燕氏為后禱祠事聞 詔入內押班梁從政管當御藥院蘇珪即皇城司鞠之獄成命侍御史董敦逸錄問遂詔廢 后 詔獄初起禁中捕逮幾三十人筆楚甚峻皆宦官宮妾柔弱之人暨錄問罪人過庭下者氣息僅屬或肢體已毀折至有無舌者無一人能聲對敦逸秉筆疑未下郝隨從旁以言脅之敦逸畏禍不能剛決乃以奏牘上蓋宰相章惇迎合於外而隨擠排於內莫有敢異議者其後敦逸奏言中宮之廢事有所因情有可察 詔下之日天為之陰翳是天不欲廢之也人為之流涕是人不欲廢之也且言其常錄問獄事恐得罪天下後世 哲宗曰敦逸不可更在言路曾布曰 陛下本以皇城獄出於近習推治故命敦逸錄問今乃貶錄問官何以取信中



外 哲宗乃然之 哲宗崩 欽聖后臨御復其位號號 元祐皇后崇寧元年馮澥上書以復 后非是臺臣合奏共附和之蔡京主其說力請不已 徽宗從之 詔依紹聖詔旨復居瑤華宮加賜希微元通知和妙靜仙師靖康元年冬金人陷京師及 二聖北狩自 道君 皇后皇太子以下后妃嬪御諸王帝姬并宗室近屬皆北徙而后以廢居瑤華不與也張邦昌為金人所逼僭位號乃奉迎 后于瑤華入居延福宮邦昌避位請 后垂簾聽政號 元祐皇后入居禁中時 康王為兵馬大元帥 后以位授之於是 康王即位于南京其後事具日歷

昭懷皇后劉氏初入宮為御侍明艷冠後庭初封昌平郡君進美人又進婕妤遂拜賢妃有盛寵由是 孟后廢元符二年立為皇后 哲宗崩 欽聖念 孟后無罪乃召入復位號稱元祐皇后而 后稱元符皇后及 欽聖崩 元祐皇后復廢乃進號 太后居崇恩宮政和三年 后無疾而崩年三十五謚曰昭懷陪葬 永泰陵 神主升祔于 哲宗廟室 徽宗顯恭皇后王氏德州刺史藻之女也歸于 端邸封順國夫人 徽宗即位冊為皇后生 欽宗崩年二十五謚曰靖和葬 永裕陵之次 神主祔于別廟改謚曰惠恭後又改曰顯恭

顯肅皇后鄭氏開封人也父紳始為直省官以 后貴累封太師樂平郡王 后本 欽聖殿押班 徽宗為端王每日朝慈德宮 欽聖命鄭王二押班供侍及 即位 欽聖以二人賜之王後封貴妃鄆王母也崇寧初 后封賢妃遷貴妃后



有異寵 徽宗多賚以詞章天下歌之 王后崩政和元年立  
為皇后 欽宗即位尊 后為 道君太上皇后居寧德宮靖  
康元年金人犯京師 后從 徽宗北遷云  
顯仁皇后韋氏開封人也生 太上皇帝 徽宗狩沙漠 后  
從北遷 太上皇帝在御尊為皇太后紹興十二年 駝駕  
還歸其後事具日歷

明達皇后劉氏贈太尉彥清女也入宮為御侍遷才人進美人  
又遷婉儀進位淑妃德妃冊拜貴妃政和三年薨年二十七  
徽宗欲踵温成故事遂追冊為皇后謚曰明達陪葬 惠恭皇  
后園

明節皇后劉氏本酒家保女也父宗元以女貴為興寧軍節度  
使始入宮為小殿直都知係 昭懷殿 被顧遇後以事囚於

宦者何訢家內侍楊戩奏取歸復得入宮明達薨以同姓之故  
使承明達閣焉由才人為婕妤累遷賢妃又為淑妃進位貴妃  
性穎悟能迎合旨合意又善裝飾衣冠塗澤一新世爭效之道士  
林靈素以左道得幸謂 上為長生帝君謂妃為九華玉真安  
妃每神霄降必別寘安妃位圖畫肖妃象謂每祀妃妃方酣寢  
而覺有酒色始妃因何訢家訢遇妃不禮焉及得志遂陷訢以  
罪未幾妃薨年三十三時宣和三年也追冊為皇后謚曰明節  
與明達並園立祠

欽宗皇后朱氏開封祥符人也父伯材武泰軍節度使 欽宗  
為皇太子冊為妃及 即位為皇后靖康之禍 欽宗幸虜營  
邀 駕以行 后亦北徙云

臣稱曰古有攝主而秦漢以來則以母后攝 國朝稱制者五



章獻擁幼君政由房闈而保祐勤勞之恩爲大慈聖宣  
仁德及天下欽聖昭慈功在社稷而宣仁致治之懿比  
迹永昭其永有自矣於虜母后攝政之賢自秦漢迄今未有  
加于我宋者也真社稷生靈之福哉

東都事略卷第十四

東都事略卷第十五  
世家三

烏乎論封建者何其紛紛哉世徒見春秋齊晉之彊漢室吳楚  
之亂遂一切歸咎於三代之良制是大不然周建親賢漢王同  
姓以蕃王室故詩所稱懷德惟寧宗子維城者封建之謂也周  
享過歷之期而漢載祀四百茲非其效與周德雖衰齊晉尚能  
攘夷狄以尊天子豈不以封建之利也哉若夫吳楚之所以亂  
者乃在於封國過制以成尾大不掉之勢爾非封建之罪也  
本朝大道之行與天下爲公故宗親無茅土之胙至熙寧中以  
宣祖太祖太宗之子擇其後一人世世封公雖有世襲之  
爵而皆聚之京師維城之固果安在哉天下治雖不封建可也  
天下有變則封建有可恃之理是以靖康之難天族亡尺寸之



柄而亦安有所謂召穆公者糾合宗族于成周是可歎也由是觀之封建宗親以屏蔽天下誠有國者之當務也哉

宣祖五子長曹王光濟次 太祖皇帝次 太宗皇帝次魏王廷美次岷王光贊

曹王光濟早亡 宋興追封邕王 徽宗即位改封曹王

魏王廷美字文化本名光美 宋興授嘉州防禦使遷山南西道節度使加同平章事徙鎮永興 太宗即位加中書令開封

尹封齊王進封秦王 太宗北征命廷美留守京師太平興國

七年出為西京留守坐與宰相盧多遜交通降涪陵縣公房州安置廷美憂悸成疾九年卒年三十八 太宗聞之流涕 詔

曰涪陵公廷美朕之同氣也宜追封涪王謚曰悼 真宗即位

追復故官爵廷美十子德恭衡州防禦使贈高密郡王德隆左

武衛大將軍贈平陽郡王德彝保信軍留後贈潁川郡王謚曰

安簡德雍天平軍留後贈廣陵郡王謚曰康簡德鈞右監門衛

大將軍德欽德潤俱右羽林將軍德文忠武軍節度使同平章

事封東平郡王贈申王謚曰恭裕德愿左武衛將軍德存左羽

林將軍德文子承顯以王後封康國公官至昭化軍節度使贈

樂平郡王 本朝故事皇族本宮之長封國公物故則以次授

封德文以慶歷四年薨承簡封徐國公承簡德鈞子也於屬為

長得封官至保慶軍留後贈安定郡王謚曰和懿承簡薨德雍

子承亮封昌國公 神宗即位拜感德軍節度使改封榮熙寧

二年 詔 宣祖 太祖 太宗之子皆擇其後一人為宗世

世封公以奉祭祀不以服屬盡故殺其恩禮至三年太常禮院

言 本朝近制諸王之後皆用本宮最長一人封公繼襲去年



東漢書卷  
詔 祖宗之子皆擇其後一人為宗世世封公即與舊制有異  
謹按禮文諸王公侯伯子男皆子孫承嫡者傳襲若無嫡子及  
有罪疾立嫡孫無嫡孫以次立嫡子同母弟無母弟立庶子無  
庶子立嫡孫同母弟無同母弟立庶孫曾孫以下準此合依禮  
令傳嫡承襲 詔曰可改封榮國公承亮為秦國公宗肅魯國  
公宗達蔡國公宗惠魏國公宗保燕國公仲郃陳國公世程越  
國公而禮官言昭成太子陳王蔡王無後而宗保宗達仲郃以  
旁親出繼自應典禮 太祖之子越王德昭當立庶長孫世程  
太宗之子魏王元佐當立嫡孫同母弟宗惠曾王元份當立嫡  
孫宗肅韓王元偓當立嫡孫宗績吳王元儼當立庶長孫宗絳  
同判太常寺陳薦以秦王宜以庶曾孫克繼嗣楚王宜以庶曾  
孫世逸嗣知禮院韓忠彥等以秦王宜以庶長孫承亮嗣楚王

宜以庶長孫從式嗣 詔秦王楚王後如忠彥議故承亮以下  
得立而宗績宗絳以喪故後封從式已封郡王後嗣令依今所  
定於是宗室克繼等言封秦王之後不當 詔兩制議翰林學  
士承旨王珪與范鎮司馬光等言臣等看詳秦王楚王魏王自  
有正統而承亮從式宗惠皆旁支今追議當為後之人豈可捨  
正統而取旁支也案秦王薨嫡子德恭當立德恭卒嫡子承慶  
當立承慶卒無嫡子有庶子五人長曰克晤先卒無子次曰克  
繼當立楚王薨長子惟叙卒嫡子從煦當立從煦卒無嫡子有  
庶子世逸一人當立魏王薨嫡子宗魯當立宗魯卒嫡長子仲  
翹先卒無子次母弟仲髦亦先卒次母弟仲蒼當立秦王楚王  
後宜如薦議魏王後當以仲蒼嗣事下中書中書言越王無嫡  
子嫡孫無嫡子同母弟無庶子無嫡孫同母弟無庶孫宜以庶



長孫世清嗣魏王無嫡子無庶子宜以庶長孫宗立嗣世程宗  
惠不應封遂以宗立封魏國公世清封越國公四年封宗續韓  
愉卒子叔牙嗣 徽宗即位秦王改封魏王

岐王光贊幼亡 宋興追封夔王 徽宗封岐王

太祖四子長滕王德秀次吳王德昭次舒王德林次秦王德芳  
滕王德秀早亡 徽宗即位追賜名封滕王

吳王德昭字日新母 皇后賀氏乾德二年出閣爲貴州防禦  
使故事帝子出閣當封王 太祖謙抑止以列辟處之開寶六

年授山南西道節度使同平章事終 太祖之世竟不封以王  
爵 太宗即位改鎮永興兼侍中始封武功郡王太平興國四  
年暴薨年二十九贈中書令追封魏王謚曰懿德昭謹重寡言

左右未嘗見其喜愠之色喜讀書不好犬馬之翫後贈太師治

平元年改封越王子惟正建寧軍節度使贈同安郡王謚曰僖

靖惟吉感德軍節度使同平章事贈南陽郡王謚曰康孝追封

冀王惟固昌州團練使惟忠武勝軍留後惟和右千牛衛將軍

惟吉子守節彰化軍留後同知宗正寺贈丹陽郡王謚曰僖穆

子世永封邢國公官至鎮南軍留後贈南康郡王謚曰脩孝慶

歷四年封十王之後以惟忠子從靄封穎國公而惟吉子守巽

以冀王後惟最長與從靄同封穎國公守巽官至和州觀察使

從靄官至齊州防禦使守巽從靄卒以惟固子從信封榮國公

官至雄州防禦使從信卒以惟固之孫從恪子世規封崇國公

世規官至右龍武大將軍沂州防禦使以卒守巽之子世清封

申國公至熙寧三年襲封越國公後封會稽郡王會 四后升



附受命告廟世清屬疾家人請以疾辭世清曰辭君命不忠廢廟祀不孝力疾就事世清官至保信軍留後贈號王諡曰恭安舒王德林早亡 徽宗即位追賜名封舒王

秦王德芳開寶九年出閣為貴州防禦使 太宗即位拜山南西道節度使同平章事薨年二十三贈中書令追封岐王諡曰康惠後贈太師改封楚王子惟叙左千牛衛大將軍贈高平郡王惟憲資州團練使惟能右羽林將軍慶歷中以惟叙子從煦封安國公終左金吾衛大將軍歸州團練使從煦卒以惟能子從古封安國公終延州觀察使諡曰惠恪從古卒從式封舒國公從式惟憲子也 神宗即位謂勦業垂統實自 太祖顧無以稱乃下 詔曰昔我 藝祖之興肇造區夏大謨偉烈被諸萬世朕奉承 聖緒夙夜不敢康乃顧後之子孫而有未議封

爵之典豈朕所以繼大統尊親親之意哉且積厚者流必遠施大者報必豐其令中書門下攷太宗之籍以屬近而行尊者一人裂土地而王之使常從獻于郊廟也世世勿復絕以稱朕尊祖報本之志焉時熙寧二年八月也於是有司推擇以從式應詔封安定郡王從式終保康軍節度使贈榮王諡曰安僖從式既薨乃封越王之孫世準為安定郡王世準從雷子也為人內恕外嚴無綺羅金玉之好既封凡 天子祀郊廟必從祀如詣旨世準官至保靜軍節度使薨贈成王世開嗣世開從誨子惟和孫也官至奉國軍留後薨諡曰獻敏世雄嗣世雄亦從雷子也秀整莊重以詩書教子孫貯書萬卷名其堂曰樂善世雄官至崇信軍節度使薨贈淄王諡曰恭惠世福嗣官至集慶軍節度使薨贈儀王令盪嗣越王之後世清薨子令廓襲封越國



公楚王之後從式薨子世恩襲封楚國公 徽宗立改封越王  
為吳王楚王為秦王

太宗九子長漢王元佐次昭成太子元僖次 真宗皇帝次商  
王元份次越王元傑次鎮王元偓次楚王元偁次周王元儼次  
崇王元億

漢王元佐字惟吉初名德崇母 元德皇后李氏太平興國五  
年出居內東門別第明年拜同平章事封衛王又明年進封楚  
王更今名初秦王廷美得罪元佐獨申救之由是失愛及廷美  
死元佐遂感心疾雍熙二年元佐疾小愈重陽召諸王宴而元  
佐以疾新起不與元佐曰諸王與宴而我不與是棄我也遂發  
憤中夜閉媵妾縱火焚宮 太宗怒廢為庶人寘于南宮 真  
宗即位為左金吾衛上將軍復封楚王 真宗東封拜太傅西

祀拜太尉中書令又遷太師加尚書令授天策上將軍賜劍履  
上殿詔書不名 仁宗即位以元佐伯父之尊恩禮甚厚薨年  
六十三追封齊王諡曰恭憲改潞王治平元年進封魏王子允  
升安國軍節度使贈平陽郡王諡曰懿恭允言黃州刺史允成  
濮州防禦使允升子宗旦崇信軍節度使開府儀同三司華陰  
郡王贈滕王諡曰恭孝 仁宗封王後以允言子宗說恭憲王  
長孫封祁國公皇祐中坐亂其子婦除名又坐坑殺女僕於宗  
室外宅鎖閉卒熙寧三年以宗惠襲封魏國公宗惠允升子中  
書以宗惠不應封而以允言子宗立襲宗惠官至武昌軍留後  
江夏郡王贈郟王宗立官至武寧軍留後贈南康郡王子仲來  
襲封官至金州刺史子不儻嗣 徽宗立改封魏王為漢王不  
儻卒子彥清乞襲父爵奉漢王祀 詔以彥清襲父爵



昭成太子元僖初名德明太平興國七年出閣授同平章事封  
廣平郡王八年進封陳王改名元佑 詔班在宰相下雍熙二  
年為開封尹加兼侍中改今名 太宗以契丹犯邊將大舉遣  
使往河北諸州科鄉民為兵元僖論其不便時趙普亦言其事  
太宗納之普為朋邪所疾元僖上表言普開國忠臣也願復以  
為相 太宗從之進封許王加中書令薨年二十七無子 太  
宗哭之慟贈皇太子謚曰恭孝改謚昭成當 仁宗之世以允  
成子宗達出後昭成太子為孫熙寧三年封燕國公以奉其祀  
宗達卒贈新平郡王謚曰恭靖子仲恕襲封官至忠州團練使  
謚曰純僖子士盍嗣

商王元份初名德嚴太平興國八年出閣改名元俊拜同平章  
事封翼王又改今名加兼侍中威武軍節度使進封越王淳化  
中兼領建寧軍改鎮寧海鎮東 真宗即位加中書令徙鎮永

興鳳翔改王雍

永熙復土為山陵使拜太傅

真宗北征為

東京留守會得疾薨年三十七贈太師尚書令鄆王改陳王又  
改潤王治平中封魯王元份寬厚言動有禮子允寧寧武軍節  
度使贈信安郡王次允中右屯衛將軍次則濮王也別傳 濮  
王薨以允寧子宗諤封虢國公至熙寧三年以宗肅龍封魯國  
公宗肅亦允寧子也終安化軍留後子仲先嗣 徽宗改封魯  
王為商王政和三年 詔曰宗室諸王追封大國其世襲子孫  
尚仍舊國甚未稱正名之意如魯王改封商王其子尚襲魯國  
之類其令大宗正司改正制以寧遠軍節度使魯國公仲先改  
封商國公

越王元傑字明哲初名德和太平興國八年出閣改名拜同平



章事封益王端拱初加侍中爲劍南西川節度使淳化中徙封吳鎮淮南鎮江元傑嘗作假山旣成召僚屬置酒共觀之翊善姚坦正直之士也獨頰首不視元傑強使視之坦曰坦見血山安得假山元傑問其故坦曰坦在田舍時見州縣督稅上下相剝急里胥臨門捕人父子兄弟送縣鞭笞流血滿身愁若不聊生此假山皆民租賦所出非血山而何是時太宗亦爲假山未成或以坦言聞太宗曰傷民如此何用山爲亟命毀之元傑有過失坦必盡言規正左右教元傑詐疾太宗憂之召元傑乳母入宮問疾增損狀乳母曰王本無疾以翊善檢束王起居故不樂成疾耳太宗怒曰吾選端士爲王僚屬者固欲輔王爲善今王詐疾欲使朕去正人邪且王年少未知出此必爾輩爲之因命杖之數十召坦慰安之至道二年移鎮淮南忠正真

宗即位授中書令徙鎮武寧泰寧封堯王加太保堯年三十三贈太尉尚書令追封安王謚曰元惠元傑力學樂善後改封邢王治平中追封陳王元傑無子仁宗以魏王之孫仲郃爲之後熙寧三年嗣封陳國公官至陳州觀察使謚曰良僖子士開嗣徵宗改封陳王爲越王

鎮王元偓字希道端拱元年出閣封徐國公至道二年拜鎮南軍節度使真宗即位加同平章事封彭城郡王改鎮靜難彰化進封寧王改王相累拜太尉兼尚書令天禧元年改兼中書令歷鎮護國成德安國鎮寧封徐王堯年四十二贈太師尚書令鄧王謚曰恭懿元偓姿表偉異厚重寡言曉音律後改封密王又改王蘇治平中追封韓王子允弼少與仁宗並席仁宗爲皇太子除英州刺史仁宗朝官至侍中武寧軍節度使



判大宗正寺北海郡王 英宗朝拜中書令徙王東平 神宗  
即位拜太保鳳翔雄武軍節度使薨贈太師尚書令兼中書令  
相王以允弼子宗績襲恭懿王封為韓國公卒贈南康郡王諡  
曰良孝宗績弟宗景官至彰信軍節度使濟陰郡王薨贈循王  
諡曰思宗績既卒子仲磨嗣 徽宗改封韓王為鎮王靖康元  
年仲磨自平川軍節度使徙鎮劔南西川

楚王元偁字令問淳化三年出閤除武昌軍節度使 真宗即  
位加同平章事封安定郡王景德中遷宣德保寧軍節度使進  
爵舒王 真宗東封進兼侍中移平江鎮江軍從祀汾陰加兼  
中書令徙鎮鎮南寧國拜太保薨年三十四贈太尉尚書令曹  
王諡曰恭惠元偁好學善屬文奉佛甚謹改贈華王治平中封  
蔡王子允則至右千牛衛將軍先是諸王子授官即為諸衛將

軍餘以父官及族屬親疎差等天禧元年令宗正卿趙安仁參  
議定制安仁請以 宣祖 太祖 太宗孫初蔭授將軍曾孫  
授右侍禁元孫授右班殿直內父爵高者聽從高蔭其事緣特  
旨者不以為例詔中書門下樞密院參定行之允則無子以平  
陽懿恭王允升之子宗達為後熙寧三年襲封蔡國公以奉其  
祀宗達卒子仲湯嗣 徽宗改封蔡王為楚王

周王元儼生而穎悟 太宗尤所鍾愛而不欲早令出宮每朝  
會宴集必侍左右期以年二十始得出就外傳 真宗即位封  
曹國公明年為平海軍節度使踰年拜同平章事景德初封廣  
陵郡王 真宗封泰山改鎮昭德等軍進爵榮王祀汾陰加兼  
侍中徙鎮安靜武信祀 太清宮加中書令坐侍婢縱火延燔  
禁中奪武信而降封端王尋拜鎮海安化軍節度使封彭王累



拜太傅歷鎮橫海永清保平定國封通王改溼王 仁宗即位  
拜太尉尚書令兼中書令徙鎮安忠武軍節度使封定王賜贊  
拜不名又賜詔書不名天聖七年徙封鎮明年賜劍履上殿明  
道初拜太師換河陽三城節度使改封孟又改鎮永興鳳翔進  
封荆王景祐二年改荆南淮南節度大使仍賜入朝不趨元儼  
廣顙豐頤資質嚴重凜凜不可犯名聞外夷契丹尤畏其名事  
母孝嚴幼好學喜聚書善爲文又善二王書法及飛白性謹約  
寡者欲天聖以來 太宗諸子獨元儼在 仁宗尊寵甚異元  
儼不敢數入闔門不接人事好坐木馬子坐則不下或飢則便  
就其上飲食往往乘輿奏樂於前酣飲終日其疾亟時 仁宗  
親爲調藥屏人與語久之所對多忠言薨年六十贈天策上將  
軍追封燕王謚曰恭肅治平中改封吳王有子十三人允良允

迪允初餘皆早死允良恭寧軍節度使襄陽郡王允良好酣寢  
以晝爲夜由是一宮之人皆晝睡夕興然性寬裕不甚喜聲色  
亦不爲他驕恣未嘗詰責左右薨贈定王有司以允良起居無  
度反易晦明謚曰易允迪居父喪哭不衰又嘗宮中爲優戲  
制曰安靜軍節度使允迪五刑之屬三千其罪莫大於不孝小  
民無知犯者猶鮮况爾燕恭肅王之子而朕之諸弟也宜率訓  
義以迪四方而乃在苴麻泣哭之哀爲酣飲流醜之佚肆情鄙  
行害于而家而達於朕聞嗟怨無已朕苟貸法何以處王公之  
上而教天下哉宜歸爵秩下領屯衛蓋寬於馭過而欲循省其  
罪無蹈後悔也可責授右監門衛大將軍久之遷密州觀察使  
復鎮安靜卒贈永嘉郡王謚曰思恪允初寧國軍節度使贈博  
平郡王謚曰安泰熙寧中以允良子宗絳嗣封吳國公 徽宗



改封吳王爲周王  
崇王元億早亡追賜名封代國公治平中封安定郡王 徽宗  
即位賜崇王

東都事略卷第十五

東都事略卷第十六

世家四

真宗六子長溫王禔次周王祐次昌王祗次信王祉次欽王祁  
次 仁宗皇帝

溫王禔早薨 徽宗即位追賜名贈溫王

周王祐字慶長母曰 章穆皇后咸平中封信國公生九年而  
薨追封周王謚曰悼

昌王祗早薨 徽宗追賜名贈昌王

信王祉早薨 徽宗追賜名贈信王

欽王祁早薨 徽宗追賜名贈欽王

仁宗三子長楊王昉次雍王昕次荆王曦

楊王昉生未踰月而薨追封褒王賜名昉謚曰懷靖後封魏王



治平中封周王 徽宗即位贈楊王

雍王昕封壽國公生三年而薨追封豫王諡曰悼穆改封魏王  
治平中封唐王 徽宗贈雍王

荆王曦慶歷三年生生三年封鄂王賜名曦未及宣制而薨諡  
曰悼懿改封陳治平中封燕王 徽宗贈荆王

濮王諱允讓字益之恭靖商王元份之子也為人天姿渾厚外  
莊而內寬左右親近未嘗見其有喜愠之色始為右千牛衛將  
軍周王薨 真宗以綠車旄節迎養于禁中至 仁宗生用簫  
韶部樂送還邸 真宗時官衛州刺史 仁宗即位授 州防  
禦使累拜寧江軍節度使 仁宗建睦親宅乃命知大宗正寺  
宗子有好學趨義則褒勉委曲進之於善若不率教始勸諭之  
又糾戒之至不悛則正其罪而上聞故人人莫不畏愛而心服

之慶歷四年封汝南郡王拜同平章事改判大宗正寺嘉祐四  
年薨年六十贈太尉中書令封濮王諡曰安懿 仁宗在位既  
久無子乃以 王第十三子為皇子 仁宗崩 皇子即位是  
為 英宗治平元年宰相韓琦等奏以 濮安懿王德盛位隆  
宜有尊禮請下有司議 濮安懿王及譙國夫人王氏襄國夫  
人韓氏仙遊縣君任氏合行典禮 詔須大祥後議之至二年  
乃 詔禮官與待制以上議翰林學士王珪等奏曰謹按儀禮  
喪服為人後者傳曰何以三年也受室者必以前服服之為所  
後者祖父母妻之父母昆弟之子若子者皆如親子也又為人  
後者為其父母傳曰何以期不二斬特重於大宗降其小宗也  
為人後者為其昆弟傳曰何以大功也為人後者降其先王制  
禮尊無二上若恭愛之心分於彼則不得專於此故也是以秦



漢以來帝王有自旁支入承統者或推尊其父母以為帝后皆見非當時取譏後世臣等不敢引以為聖朝法况前代入繼者多宮車晏駕之後援立之策或出臣下非如仁宗皇帝年齡未衰深惟宗廟之重祇承天地之意於宗室衆多之中簡推聖明授以大業陛下親為先帝之子然後繼體承祧先有天下濮安懿王雖於陛下有天性之親顧復之恩然陛下所以負宸端冕富有四海子子孫孫萬世相承皆先帝德也臣等竊以為濮王宜準先朝封贈期親尊屬故事尊以高官大國譙國襄國仙遊亦封太夫人攷之古今為宜稱於是中書奏王珪等所議未見詳定濮王當稱何親名與不名珪等議濮王於仁宗為兄於皇帝宜稱皇伯而不名如楚王涇王故事中書又奏儀禮令及五服年月救出繼之子於

所繼所生皆稱父母又漢宣帝光武皆稱父為皇考今珪等議稱濮王為皇伯於典禮未有明據請下尚書省集三省御史臺議奏方議而皇太后手詔詰責執政於是手詔如聞集議不一宜權罷議當令有司博求典故以聞禮官范鎮等入奏漢之稱皇考稱帝稱皇立寢廟序昭穆皆非陛下聖明之所法宜如前議為使自是御史呂誨等彈奏歐陽脩首建邪議韓琦曾公亮趙槩附會不正之罪固請如王珪等議既而內出皇太后手詔曰吾聞羣臣議請皇帝封崇濮安懿王至今未見施行吾載閱前史乃知自有故事濮安懿王譙國夫人王氏襄國夫人韓氏仙遊縣君任氏可令皇帝稱親濮安懿王稱皇王氏韓氏任氏並稱后事方施行而英宗即日手詔曰稱親之禮謹遵慈訓追崇之典豈易克當且欲以



為園即園立廟俾王子孫主奉祠事翌日誨等以所論列彈奏不見聽用繳納御史劾告家居待罪誨等所列大抵以為前詔稱權罷集議後詔又稱且欲以塋為園即追崇之意未已英宗命閣門以告還之誨等力辭臺職誨等既出而濮議亦寢至神宗元豐二年詔以濮安懿王三夫人可並稱曰王夫人云濮王長子宗懿當英宗時為宿州團練使封和國公次子宗樸為隴州防禦使封岐國公宗懿卒神宗以宗懿濮安懿王元子追封舒王宗樸與英宗相友愛初詔英宗入居慶寧宮固辭不即赴宗樸帥近屬勸乃入治平中建濮王園廟宗樸遂拜彰德軍節度使濮國公以奉王後神宗即位加同平章事兼侍中封濮陽郡王薨贈定王弟宗誼襲濮國公官至昭化軍節度使同平章事贈廣陵郡王宗誼既

薨宗暉襲封濮國公自邕州觀察使拜淮康軍節度使元豐中濮王三夫人改祔濮王園以宗暉為鎮安軍節度使同平章事神宗詔宗暉嗣封濮王哲宗即位徙鎮鎮南薨贈懷王謚曰榮穆以宗晟嗣官至武安軍節度使贈昌王謚曰端孝宗晟薨宗愈嗣官至鎮南軍節度使開府儀同三司贈襄王宗愈孝端宗綽薨宗楚嗣官至武昌軍節度使贈惠王謚曰僖節宗楚薨宗祐嗣官至清海軍節度使贈欽王宗祐薨宗漢嗣官至奉寧軍節度使開府儀同三司贈景王宗漢薨仲增嗣官至濮王孫於屬為長故封官至彰德軍節度使開府儀同三司贈簡王仲增薨仲御嗣官至奉寧軍節度使開府儀同三司贈邠王謚曰康王仲御薨仲爰嗣官至武定軍節度使開府儀同三



司判大宗正寺贈恭王仲爰薨仲理嗣靖康初為武安軍節度使開府儀同三司

臣稱曰禮大宗無子而以小宗為後聖人許之 英宗既以父仁宗矣若 濮王又稱親則是二統也父子之道天性也君臣之義也藉使 濮王極其尊崇則於君臣之義得為安乎當時大臣違禮廢義室臣焉得不以死爭之 英宗容受盡言寢而不議而使後世無可指之瑕聖矣夫

英宗四子長 神宗皇帝次吳王顥次潤王顥次益王顥

吳王顥字仲明母曰 宣仁聖烈皇后始名仲糾授率府副率英宗即位遷至明州觀察使封祁國公賜今名拜保寧軍節度使同平章事東陽郡王治平三年出閣居東宮 神宗即位拜武昌武安軍節度使封昌王易泰寧鎮海軍改王岐官制行冊

拜司空徙王雍 哲宗嗣位拜太保換成德橫海二鎮徙封揚

王用周漢故事賜贊拜不名五日一朝見於禁中 神宗祔廟

拜太傅移鎮京兆鳳翔元祐初與荆王顥遷外第名曰親賢宅

拜太尉諸子自勝衣以上皆命進官 制曰 先皇帝篤兄弟

之好以恩勝義不許二叔出居于外蓋武王待周召之意 太

皇太后嚴朝廷之禮以義制恩始從其請出就外宅得孔子遠

其子之意 二聖不同同歸于道可以為萬世法朕承侍 兩

宮按行新第顧瞻懷思潛然出涕昔漢明帝問東平王在家何

以為樂王言為善最樂帝大其言因送列侯印十九枚諸子年

五歲以上悉佩之著之簡策天下不以為私今王諸子性于忠

孝漸于禮義自勝衣以上頎然皆有成人之風朕甚嘉之其各

進一官以助其為善之樂尚勉之哉母恭乃父祖以為邦家光



徙封徐王詔書不名 宣仁祔廟拜太師徙王冀賜入朝不趨  
改淮南荆南節度使徙封楚初 宣仁不豫顥日間起居因以  
被疾至是薨年四十七 哲宗哭之慟成服苑中贈尚書令兼  
中書令謚曰榮顥薨之五日以月朔應視朝于文德殿 哲宗  
以顥未成服改視垂拱云顥通經史工飛白善鼓琴 神宗臨  
御久反愛彌篤 哲宗尊禮尤隆既薨葬于 永厚陵之北  
徽宗即位追封吳王子孝騫靖康初為定武軍節度使晉康郡  
王孝錫終嘉州防禦使

潤王顥早薨 徽宗追賜名贈潤王

益王顥初賜名仲恪為率府副率 英宗時賜名遷至耀州  
觀察使 神宗即位拜同平章事領武勝軍節度使樂安郡王  
熙寧四年出閣拜保信保鎮軍節度使封嘉王元豐三年拜司

空徙王曹

哲宗即位拜太保改鎮武昌武安進爵荆王賜贊

拜不名五日一朝禁中

哲宗致恭如家人禮

神宗祔廟拜

太傅徙武寧鎮海元祐元年始居外第拜太尉改鎮成德荆南

薨年三十三贈太師尚書令魏王謚曰端獻

徽宗改封益王

顥端重明粹博通羣書有智識好釋氏亦好方書數捐藥以救  
病者其仁厚蓋天稟云子孝哲邢州觀察使贈廣陵郡王孝怡  
終保寧軍節度使孝參靖康時為武勝軍節度使豫章郡王孝  
奕終章化軍留後贈平原郡王孝隲靖康時為武寧軍節度使  
孝忱奉寧軍節度使孝穎順昌軍節度使孝愿靖難軍節度使



東都事略卷第十七

世家五

神宗十四子長成王侑次惠王僅次唐王俊次褒王伸次冀王  
儻次哲宗皇帝次豫王侂次徐王侑次吳王泌次儀王偉次  
徽宗皇帝次燕王俟次楚王似次越王愬

成王侑早薨 徽宗即位追賜名贈成王

惠王僅早薨 徽宗追賜名贈惠王

唐王俊熙寧七年封建國公十年薨贈亮王 徽宗封唐王

褒王伸早薨 徽宗追賜名贈褒王

冀王儻熙寧八年封建景國公是歲薨 徽宗贈冀王

豫王侂熙寧十年封建國公元豐元年薨贈衛王 徽宗封豫王

徐王侑早薨贈鄆王諡曰冲惠 徽宗封徐王



吳王佖元豐間封儀國公 哲宗即位封大寧郡王紹聖二年  
出閣拜鎮安武勝軍節度使封申王元符二年加司空徙鎮保  
平泰軍 哲宗崩 欽聖后議所立以佖有目疾不得立乃立  
端王是為 徽宗加太傅移鎮永興成德徙王陳賜贊拜不名  
加大尉荆南淮南節度使拜太師徙鎮河東山南西道薨贈尚  
書令兼中書令燕王又加贈侍中吳王子有奕武信軍節度使  
和義郡王有常寧遠軍節度使

儀王偉早薨 徽宗追賜名贈儀王

燕王佖元豐間封成國公 哲宗即位封咸寧郡王元符元年  
出閣拜河陽三城雄武軍節度使封萃王加司空移鎮武軍鎮  
寧 徽宗即位加太保徙鎮河東奉寧封衛王又徙鎮護國山  
南西道又改鎮海泰寧大觀元年 詔曰衛王定王朕之愛弟

也其改封魏王定王亦徙王鄧拜太尉永興成德軍節度使進  
爵燕王遷太傅 欽宗即位 詔曰燕王越王 神宗之子

道君之弟而朕之諸父也其賜入朝不趨贊拜不名授太師河  
東劍南西川節度使 二帝北狩宗族盡徙云

楚王似元豐間封和國公 哲宗即位封普寧郡王元符元年  
出閣拜橫海鎮海軍節度使封簡王 哲宗崩宰相章惇以似  
哲宗同母弟當立 欽聖后不可乃立 徽宗進司徒改鎮武  
昌武寧徙封蔡拜太保移鎮保平鎮安又改鳳翔雄武以書史  
語言指斥送大理寺驗治似上表待罪於是左司諫江公望上  
疏曰臣聞天下之理有隙則物皆可入故聖人塗隙於未開之  
前有迹則瑕皆可指故聖人泯迹於未形之際物可入則親者  
離矣瑕有指則疑者實矣其可不察邪臣聞蔡王府史相告有



不順之語浸淫恐及蔡王有司已行根治臣聞之駭汗浹背驚悸不自持豈有孝治之本太平之時乃容小人銜私怨逞不軌離間 陛下骨肉之親者乎象之於舜焚廩浚井其逆心已萌矣擁二女坐床鼓琴其逆謀已成矣舜未嘗藏怒宿怨卒封之有庠而富貴之也至魏文帝褊忿疑忌一陳思王且不能相容致有煮豆然萁之說相煎太急之語為天下後世笑豈不思兄弟人之大倫也有手足相捍之親有首尾相應之義有墳墓之和有友于之樂故孔子以不間於父母兄弟之言為孝蓋親隙不可開隙開則言可離貳疑迹不可顯迹顯則事難磨滅陛下之得天下也惇嘗 簾前持異議已有隙迹矣蔡王出於無心年尚幼少未達禍亂之萌故恬不以為卹 陛下一切包容已開之隙復塗矣已顯之迹復泯矣思意渥縟歡然不失兄弟

之情與夫區區未能忘天下操以自狹者不啻相百十矣 陛下若以曖昧無根之語而加諸至親骨肉之間則有魏文相煎太急之隙而忘大舜親親之道豈治世之美事也臣願 陛下密詔有司凡無根之言勿形案牘筮楚之下何求弗得一有浸淫旁及蔡王之語不識 陛下將如何處之儻形案牘有瑕可指一入胷次終身不忘雖父子之間尚未能磨滅况兄弟乎迹不可泯隙不可塗則骨肉離矣 陛下將何道以治天下也蔡王萬一蒙犯霧露之疾 神考在天之靈豈不知之 陛下將何顏見 神考於 太廟乎書曰克明俊德以親九族九族既睦平章百姓詩曰刑于寡妻至于兄弟以御于家邦故至德要道足以風動天下未有不自親始者也疏入公望罷知淮陽軍徽宗雖黜公望頗思其言止治其左右崇寧中徙鎮荆南武寧



薨贈太師尚書令兼中書令韓王改封楚王子有恭定國軍節度使永寧郡王

越王偲元祐初封祁國公元符元年封永寧郡王出閣以為鎮安集慶軍節度使封睦王 徽宗即位拜司徒移鎮清海鎮海封定王又徙鎮武寧武勝改鎮淮南永興進封鄧王拜太尉鳳翔山南西道節度使改封越王遷太傅 欽宗即位授太師永興成德軍節度使金人犯 京師欲以越王為質 欽宗以越王叔父不可遣乃遣肅王及駙馬都尉曹晟以行晟尚榮德帝姬與 欽宗同生故遣之偲竟從 二帝北遷云

哲宗獻愍太子茂母 皇后劉氏生一年而薨追賜名贈越王謚曰冲獻 徽宗即位贈鄧王崇寧二年 詔曰朕惟 先皇帝在位十有六年而皇嗣鄧王降年不永逮朕入繼大統之初

雖加贈典而恩意未隆非所以上慰 先帝在天之靈其特追贈皇太子仍改謚曰獻愍

徽宗三十一子長 欽宗皇帝次堯王檉次鄆王楷次荆王楫次肅王樞次景王杞次濟王栩次益王棫次 太上皇帝次邠王材次祁王模次莘王植次儀王朴次徐王棣次沂王樗次鄆王拱次和王栻次信王椿次漢王椿次安康郡王檉次廣平郡王捷次相國公榘次陳國公機次瀛國公樾次建安郡王模次嘉國公椅次溫國公棟次英國公穗次儀國公桐次昌國公柄次潤國公縱

堯王檉以建中靖國元年九月生一夕而殞追賜名贈堯王謚曰冲僖

鄆王楷字德遠初名煥崇寧元年封魏國公更今名封高密郡



王以八寶恩除司空鎮東軍節度使封嘉王遷太保又遷太尉  
政和六年出閣拜太傅武寧保平軍節度使八年令赴殿試有  
司考為第一改鎮荆南寧江提舉皇城司封鄂王徙劍南西川  
鎮南軍又徙河東寧海靖康元年移鎮鳳翔彰武 徽宗諸子  
薨于京師者則哀榮終始備見焉餘從 二帝北遷皆不知其  
所終

荆王楫崇寧二年封楚國公三年封南陽郡王改王樂安薨贈  
荆王諡曰悼敏

肅王樞崇寧三年封吳國公大觀二年封建安郡王重和元年  
出閣拜太保保平寧武軍節度使封肅王靖康元年金人犯京  
師以樞北質云

景王杞崇寧三年封冀國公大觀二年封文安郡王重和元年

出閣拜太保護國武昌軍節度使封景王靖康元年授太傅徙  
鎮荆南鎮東

濟王栩崇寧五年封魯國公大觀二年封安康郡王宣和三年  
拜太保清海軍節度使封濟王靖康元年授太傅徙鎮護國寧  
海

益王棫大觀元年封楊國公二年封淮南郡王徙濟陽後以橫  
海軍節度使封益王

邠王材大觀二年封魏國公薨追封邠王諡曰冲穆

祁王模大觀二年封鎮國公宣和三年封樂安郡王拜武勝興  
寧軍節度使封祁王靖康元年授太傅改鎮清海慶源

莘王植大觀二年封吳國公宣和四年封信安郡王拜寧江軍  
節度使封莘王靖康元年授太傅改鎮保平崇信



儀王朴大觀三年封雍國公宣和五年封華原郡王後以靜難軍節度使封儀王

徐王棟大觀三年封徐國公宣和五年封高平郡王拜山南東道節度使封徐王靖康元年授太傅改鎮山南西道武昌軍沂王樛大觀四年封冀國公宣和六年封河間郡王拜太保劍南東川威武軍節度使封沂王靖康元年授太傅改鎮河陽武寧

鄆王拱政和元年封定國公二年薨追封鄆王諡曰冲懿和王棻政和元年封廣國公宣和七年封南康郡王靖康元年拜瀛海安化軍節度使封和王信王榛政和元年封福國公宣和七年封平陽郡王靖康元年拜慶陽昭化軍節度使封信王

漢王椿政和二年封慶國公薨追封漢王

安康郡王樞政和二年封衛國公改封鄆靖康元年封安康郡王

廣平郡王捷以政和三年封韓國公靖康元年封廣平郡王相國公樾以政和四年封

陳國公機以政和五年封

瀛國公樾以政和五年封

建安郡王樞政和五年封惠國公宣和七年封建安郡王

嘉國公椅以政和八年封

溫國公棟以宣和元年封

英國公穗以宣和二年封

儀國公椅以宣和三年封



昌國公柄以宣和四年封  
潤國公樞以宣和七年封

欽宗皇太子諶母曰 皇后朱氏以政和七年生於東宮於  
徽宗為嫡長皇孫及應賜名命官而 祖宗無故事宰相蔡京  
與鄭居中共議封為崇國公王黼奏曰蔡京以皇子之禮封  
東宮子則是便以 東宮為人主矣 徽宗不悅 欽宗即位  
以為昭慶軍節度使大寧郡王從鎮寧國立為皇太子是歲金  
人圍京師明年 欽宗幸虜營以皇太子監國從 二帝北徙  
云

東都事略卷第十七



